

Kapítulo 8

DOKTRINA DI DIOS

Méskos ku otro doktrinanan di e Iglesia di Hesukristo di e Santunan di e Deláster Dianan, siñansa mormon tokante Dios a eksperensía un evolushon. Na komienso di mormonismo, nan doktrina di Dios tabata hopi similar ku loke Beibel ta siña. Pero ku tempu, Hosé Smith su punto di bista a kambia i poko poko el a guia henter e sekta mormon den direkshon di doktrina pagano. Nota nan siñansa di Dios:

I. TIN HOPI DIOS—POLITEISMO

Tempu di skirbimentu di e *Buki di Mormon*, Hosé Smith su kreensia tokante Dios tabata monoteista (un Dios so ta eksistí), ku Dios ta un ser spiritual, i ku Hesukristo ta Dios. *Buki di Mormon* ta reflehá su kreensia e tempu ei:

"...Dios Mes lo baha serka e yunan di hende, i lo redemí su pueblo. I pasobra e ta eksistí den karni lo yam'é Yu di Dios, komo ku el a hasi karni someté na boluntat di e Tata, siendo e Tata i e Yu...i nan dos ta un Dios, si, e Dios Eterno di shelu i tera mes. I asina karni a bira sumiso na e Spiritu, òf e Yu na e Tata, siendo un Dios..." (Mosía 15:1-2,4-5).

"I Ziezmòr a bis'é: Bo ta bisa ku tin un Dios bèrdadero i bibu? I Amulek a bisa: Si, tin un Dios bibu i bèrdadero. Awor Ziezmòr a bisa: Tin mas ku un Dios? I el a respondé, Nò. Awor Ziezmòr a bolbe bis'é: Kon bo sa e kosnan aki? I el a bisa: Un angel a lagami sa di nan" (Alma 11:26-31). "Ata, ami ta esun ku tabata prepará for di fundeshi di mundu pa redemí mi puebel. Ata, ami ta Hesukristo. Ami ta e Tata i e Yu" (Eter 3:14).

"...el a bisa nan ku Kristo tabata e Dios, e Tata di tur kos, i a bisa ku el a tuma riba su mes e imágen di hende..." (Mosia 7:27)

Ta parse sinembargu ku Smith su doktrina tokante Dios a kambia drástikamente poko tempu despues ku el a skirbi e *Buki di Mormon*. Hosé Smith a kuminsá siña ku tin hopi dios, pues politeismo. Ora nos ta kompará dos teksto kasi idéntiko den e buki mormon sagrado, *Pèrla di Gran Preis*, por nota monoteismo kla den e promé buki, *Buki di Moises*. Ma *Buki di Abraham* tabata skirbí despues ku Smith a aseptá politeismo (e kreensia ku hopi dios ta eksistí).

Buki di Moises	Buki di Abraham
"Ami ta e prinsipio i fin, Dios todopoersoso; pa medio di Mi úniko Yu Mi a krea tur kos; si, na prinsipio mi a krea shelu i e tera unda bo ta para."	"I nan a baha na prinsipio, i nan, esta e Diosnan, a organisá i forma e shelunan i e tera."
"I ami, Dios, a bisa: Sea lus, i tabatin lus."	"I nan (e Diosnan) a bisa: Sea lus, i tabatin lus."
"I Atrobe, ami, Dios, a bisa: Laga tin un firmamentu meimei di e awa..."	"I e Diosnan tambe a bisa: Laga tin un repartishon meimei di e awanan..."
"I ami, Dios, a yama e tera seku Tera..."	"I e diosnan a yama tera seku, tera..."
"I ami, Dios, a krea bestia nan di tera segun nan sorto..."	"I e Diosnan a organisá tera pa produsí bestia segun nan sorto..."
"I ami, Señor Dios, a planta un hòfi pariba den Eden"	"I e Diosnan a planta un hòfi, pariba den Eden"
Moises 2:1,3,6,10,25; 3:8	Abraham 4:1,3,6,10,25; 5:8

Ripará vários deklarashon di lídernan prominente di mormonnan. Smith a deklará ku "e doktrina di pluralidat di diosnan ta mes prominente den Beibel ku kualke otro doktrina. E ta tur kamina den Beibel."¹ "Na prinsipio, kabes di e diosnan a yama un reunion di diosnan; i nan a reuní i forma plan pa krea mundu i hende."² "Kuantu Dios tin, mi no sa" Brigham Young a atmití. "Ma nunca tabatin un tempu ku no tabatin Diosnan..."³ E apòstel mormon, Orson Pratt, a indiká ku hopi dios ta eksistí: "Si nos tuma un mion mundu manera esun aki i konta kada pida, nos lo haña sa ku tin mas Dios ku tin pidanan material den e mundunan ei."⁴

Un otro evidensia ku mormonismo a bandoná monoteismo na favor di politeismo ta e echu ku na aña 1835, ora nan a imprimí *Doktrina i Aliansanan* pa di promé biaha, nan a inkluí un sekshon di setenta página entitulá "Lekturanan tokante Fe." E sekshon aki, ku klaramente a siña monoteismo, a keda aseptá pa iglesia mormon pa un voto unánime di parti di un konferensia general 17 di ougùstùs 1835. Sinembargu ora nan a imprimí *Doktrina i Aliansanan* di nobo na aña 1921, nan no a inkluí e "Lekturanan." Tur edishon a ekskluí nan desde e fecha ei. Un motibu ku Joseph Fielding Smith a duna pa esaki ta ku e "Lekturanan" no tabata kompleto den nan siñansa tokante divinidat. Pero ta mas ku kla ku e iglesia ku a bira politeista a ekskluí nan pa motibu di nan siñansa monoteista.

Ta opvio ku Beibel ta siña monoteismo, kontrali na e afirmashonnan mormon. Beibel no ta laga duda ku un Dios so ta eksistí. "Asina SEÑOR, e Rei di Israel, i su Redentor, e SEÑOR di ehérsitonan, ta bisa: 'Ami ta e promé i Ami ta e último, i no tin Dios fuera di Mi. ...Tin otro Dios fuera di Mi, òf tin otro Baranka? Mi no konosé ningun'" (Isaias 44:6,8). "Ami ta SEÑOR i no tin ningun otro; fuera di Mi no tin Dios...Ami ta SEÑOR, i no tin ningun otro...I no tin otro Dios fuera di Mi, un Dios hustu i un Salbador; no tin otro sino Ami so. ...Ami ta Dios i no tin ningun otro.'" (Isaias 45:5,6, 21,22). "Ami ta Dios, i no tin ningun otro Dios. Ami ta Dios, i no tin ningun manera Mi " (Isaias 46:9). Ta klaro ku e politeismo mormon ta kontradisí loke Beibel ta afirmá.

II. E TRINIDAT NO TA EKSISTI

Ta opvio ku José Smith i e promé mormonnan un tempu a kere den e trinidad, esta ku tin un Dios so, ma ku E ta eksistí komo tres persona distinto, Tata, Yu, i Spiritu Santu. *Buki di Mormon*, e promé buki di mormonismo, ta reflehá esaki den diferente teksto. "...esaki ta e doktrina di Kristo, i e úniko i bèrdadero doktrina di e Tata, i di e Yu, i di Spiritu Santu, ku ta un Dios, sin fin" (II Nefi 31:21). "...Kristo e Yu, i Dios e Tata, i Spiritu Santu, kendenan ta un Dios Eterno..." (Alma 11:44). Tambe ta notábel ku e último palabranan di e tres testigunan den e

introdukshon di e *Buki di Mormon*: "I e onor sea na e Tata, i na e Yu, i na Spiritu Santu, ku ta un Dios. Amèn."

Awendia mormonnan ta bisa ku nan ta kere den e Tata, Yu, i Spiritu Santu. Ma nan no ta kere den e trinidad di bèrdat. Nan kreensia den e trinidad ta mas bien un forma di politeismo, esta ku e Tata, Yu, i Spiritu Santu ta tres dios distinto—no un solo Dios.

"Tin tres dios...separá den personalidat, uní den propósito, den plan, i den tur atributo di perfekshon."⁵

Hosé Smith a prediká dia 16 di yüni 1844:

"Semper mi a deklará ku Dios ta un personahe distinto, Hesukisto un personahe separá i distinto for di Dios e Tata, i ku Spiritu Santu ta un personahe distinto i ta un Spiritu: i e tresnan aki ta forma tres personahe distinto i tres Dios..."⁶

E palabranan aki di Hosé Smith ta lamta uninterogente. Smith a yega di bisa ku e *Buki di Mormon* ta e buki di mas korekto na mundu.⁷ Pero awor Smith ta bisa ku loke e *Buki di Mormon* ta bisa—ku tin un solo Dios—no ta bèrdat. Mormonnan no ta onesto pa sigui afirmá ku tantu Hosé Smith komo e *Buki di Mormon* ta korekto. Sigur un di nan a kiboká!

III. DIOS POR KAMBIA

Den un estudio di Dios, Su atributonan ta di suma importansia. Beibel ta bisa ku Dios no por kambia: "Pasobra Ami, SEÑOR, no ta kambia..." (Malakias 3:6). Santiago 1:17 ta deklará ku ni asta "tin variashon ni sombra di kambio" serka Dios. *Buki di Mormon* ta di akuerdo: "Pasobra nos no ta lesa ku Dios ta e mésun ayera, awe, i pa semper, i den dje no tin variashon ni sombra di kambio? I awor, si boso a imaginá den boso mes un dios ku ta varia, i den kende tin sombra di kambio, e ora ei boso a imaginá den boso mes un Dios ku no ta un Dios di milagernan" (Mormon 9:9-10). "Pasobra mi sa ku Dios no ta un Dios parsial, ni un ser variabel; pero E ta invariabel di tur etèrnidat te na tur etèrnidat" (Moroni 8:18). Ma maske tantu Beibel komo *Buki di Mormon* ta afirmá ku Dios no por kambia, mormonismo ta kontradisí nan bukinan inspirá i a inbentá un Dios ku a kambia. Wilford Woodruff, di kuater presidente mormon, a bisa ku "Dios mes ta krese i progresá den konosementu, poder, i dominio, i lo sigui, etèrnamente."⁸ Brigham Young a repretendé Orson Pratt pasobra el a kere ku Dios ta inkambiabel: "Segun su teoria, Dios no por progresá mas leu den konosementu i poder; ma e Dios ku mi ta sirbi ta progresá eternamente..."⁹

IV. TUR E DIOSNAN TA DEN UN OF OTRO FASE DI DIVINIDAT

E Santunan di e Deláster Dianan ta kere ku tur e diosnan a eksistí promé komo spiritunan. Despues, pa nan por haña un kurpa, nan a bin na mundu komo hende i pasa dor un periodo di prueba promé ku nan por a desaroyá te yega na divinidat.

E Dios supremo ta Dios Tata debí ku El a desaroyá mas ku tur otro dios te yega na e kulminashon aktual di divinidat. P'esei E ta superior ku e otro diosnan. Pues, nos por komprendé ku méskos ku tin diferensia entre e angelnan, di e mésun forma tin diferensia den diosnan di un grado pa otro—algun ta mas desaroyá komo dios ku otro.¹⁰

V. UN TEMPUS DIOS TABATA HENDE

Di unda Dios i tur e otro diosnan a bin? Por bisa den un sintido ku segun siñansa mormon, hende a eksistí promé ku Dios, pasobra Dios tabata hende promé ku El a bira Dios. Hosé Smith a siña: "Un tempus Dios mes tabata manera nos ta, i ta un hòmer eksaltá, sintando

riba trono na shelu ayá!...Si bo lo por a mir'é awe, lo bo mir'é den forma di un hende...Un tempu e tabata hende méskos ku nos; si... Dios mes, e Tata di nos tur, a biba riba un mundu, méskos ku Hesukristo mes a hasi..."¹¹ Joseph Fielding Smith a splika ku "...nos Tata na shelu un tempu a pasa dor di bida i morto i ta un hòmber eksaltá."¹²

"Promé, Dios mes, ku ta sinta riba un trono aya na shelu, ta un hende méskos ku kualke di boso...si boso a mir'é awe, boso lo mir'é den tur e personahe, imagen i e mésun forma ku hende...Mi ta bai konta boso kon Dios a bira Dios. Nos a imaginá ku Dios tabata Dios for di etèrnat...Dios mes; e Tata di nos tur a biba riba un mundu méskos ku Hesukristo mes a hasi..."¹³

Segun Apòstel Orson Hyde:

"Kòrda ku Dios, nos Tata selestial, kisas tabata un mucha un tempu, i mortal méskos ku nos, i a subi paso a paso riba eskala di progreso den e skol di avanse; a bai dilanti i vense te ku El a yega na e punto unda E ta awor."¹⁴

Milton Hunter, un líder den iglesia mormon, a skirbi:

"...Dios, e Tata Etèrno, un tempu tabata hende mortal ku a pasa dor di e skol di bida riba mundu similar ku loke nos ta pasa aden awor. El a bira Dios—un ser eksaltá—pa medio di obedesé e mésun bèrdatan etèrno di e Evangelio ku nos tin oportunitat di obedesé awe."¹⁵

No solamente Dios tabata hende, ma E asta tabata un hende ku a kai, segun Orson Pratt:

"E Diosnan ku ta biba na Shelu...a wòrdu redimí for di e graf den un mundu ku a eksistí promé ku fundeshi di e mundu aki a wòrdu poné. Nan i e kurpa Selestial ku nan ta habitá awor, un tempu tabata den un estado ku a kai...nan a wòrdu eksaltá tambe, for di hende ku a kai pa [bira] Diosnan Selestial pa habitá na Shelu pa semper i semper."¹⁶

Na diferente okashon Beibel ta deklará ku Dios no ta (òf tabata) hende: "Dios no ta hende, ku E lo gaña, ni yu di hende, ku E lo repentí..." (Numbernan 23:19). "...Ami ta Dios i no hende, Esun Santu meimei di boso..." (Oseas 11:9).

VI. DIOS TIN UN KURPA FISIKO MESKOS KU HENDE

Beibel ta bisa kla ku Dios ta un Ser spiritual: "Dios ta spiritu..." (Juan 4:24). Hesus a deskribí kiko un "spiritu" ta ora El a bisa ku "spiritu no tin karni ni wesu" (Lukas 24:39). Na un otro okashon Hesus, papiando di un revelashon ku Dios a duna Pedro, a bis'é ku karni ni sanger no a rebelá bo esei, sino mi Tata ku ta na shelu" (Mateo 16:19), mustrandó ku Su Tata na shelu no ta konsistí di karni i sanger.

Rechasando e siñansa kla di Beibel, mormonismo ta deklará ku "e Tata tin un kurpa di karni i wesu igual ku un hende: e Yu tambe..." (*Doktrina i Aliansanan* 130:22). Bruce R. McConkie ta agregá: "Dios... ta un Ser personal, un hende santu i eksaltá, un Personahe glorifiká i resusitá ku tin un kurpa di karni i wesu bèrdadero, un Entidat antropomórfiko..."¹⁷ Parley Pratt ta bisa ku "kada un di e diosnan aki, inkluiendo Hesukristo i Su Tata, tin no solamente un spiritu organisá, ma tambe un kurpa glorioso inmortal di karni i wesu..."¹⁸ James Talmage a skirbi "...ta klaru ku e Tata ta un ser personal, ku E tin un forma spesífiko, ku partinan di kurpa i pashonnan spiritual."¹⁹ E mésun outor tambe a skirbi "Nos ta afirmá ku pa nenga ku Dios ta

un persona material ta pa nenga Dios; pasobra...un kurpa inmaterial no por eksistí."²⁰ Pa mormonismo, Dios ta un Ser físico, méskos ku hende. Ta klaro ku mormonnan a rechasá e úniko Dios bèrdadero i na Su lugá a pone un hende finito di karni i wesu. Romanonan 1:23 tambe ta deskribí mormonismo, bisando ku nan "a kambia e gloria di Dios inkoruptibel pa un imagen di hende koruptibel..."

VII. KON DIOS A BIRA DIOS

Milton R. Hunter, un miembro di e Promé Konsilio di Setenta a splika:

"Profetanan mormon a siña kontinuamente e bèrdat sublime ku Dios Tata Etèrno un tempu tabata un hende mortal ku a pasa dor di e skol di bida riba tera, méskos ku nos ta eksperensia awor. El a bira Dios—un ser eksaltá—pa medio di obedensia na e mésun bèrdatnan di e Evangelio etèrno ku nos tin oportunitat di obedesé awe.

...nos mester aseptá e echu ku tabatin un tempu ku Divinidad tabata muchu ménos poderoso ku E ta awe. Kon anto El a wòrdu glorifiká i eksaltá i yega na Su Divinidad aktual? Na promé lugá, hopi tempu pasá sin duda Dios a hasi uso di kada oportunitat di siña e leinan di bèrdat...Dia pa dia El a usa Su boluntat vigorosamente,...el a haña mas konosementu...Asina el a krese den eksperensia i a sigui krese te ora el a yega na divinidad. Den otro palabra, El a bira Dios pa medio di obedensia absoluto na tur e leinan etèrno di e Evangelio..."²¹

Mormonismo tin un Dios ku a pasa dor di diferente fase di evolushon pa e yega na divinidad. El a bira Dios pasobra El a obedesé kompletamente e leinan ku ta goberná universo. En kontraste di nan Dios, e leinan ku ta goberná universo ta eksistí riba nan mes pa tur etèrnidat i nunca tabata kreá. Pues, di bèrdat e leinan aki mester ta mas grandi ku Dios.

VIII. HENDE TIN SOLAMENTE UN DIOS

Segun teologia mormon, maske hopi Dios ta eksistí, tòg nos ku ta biba riba e mundu aki tin un Dios so. José Smith a afirmá "...e doktrina di un pluralidat di diosnan ta mes prominente den Beibel ku kualke otro doktrina. E ta tur kaminda den Beibel. ...Pablo ta bisa ku tin Diosnan hopi i Señornan hopi. Mi ke splika na un manera kla i simpel; ma pa nos tin un Dios so—esta, pertenesiendo na nos... E kabesantenan di e Diosnan a apuntá un Dios pa nos tur..."²² Segun mormonismo, p'esei nos ta adorá solamente un Dios. Pakiko e Dios aki ta yamá "Dios Tata?" Ta pasobra E ta e tata literal di tur ser humano riba nos mundu; ta E ku a engendrá tur spiritu ku a haña kurpa humano riba nos planeta.

IX. E DIOSNAN TA POLIGAMISTA

Ademas iglesia mormon ta siña ku Dios Tata i tur e otro dios tin hopi esposa i ta haña un méskos ku hende. Orson Pratt a deklará "Nos a mustra awor kla ku Dios Tata tabatin un pluralidat di esposa, ku un òf mas den etèrnidat (pasado), pa medio di kua El a engendrá nos spiritunan i tambe e spiritu di Hesus Su primogénito."²³ "Si ningun sino e Diosnan lo ta pèrmití di multipliká yunan inmortal, ta lógiko ku kada Dios mester tin un òf mas esposa."²⁴

X. DIOS TATA TIN UN TATA

Un líder prominente den Iglesia di e Santunan di e Delaster Dianan, Heber C. Kimball, a deklará: "...anto nos lo bai bèk na nos Tata i Dios, ku tin konekshon ku un ku ta mas promé ainda; i e Tata aki tin konekshon ku un ku ta ainda mas promé, èts..."²⁵ "...nos Dios ta un hende natural...Di unda el a haña su konosementu? For di su Tata, presis manera nos ta haña

konosementu di nos mayornan."²⁶ Orson Pratt a splika "Nos a wòrdu engendrá pa nos Tata na Shelu; e persona di nos Tata na Shelu a wòrdu engendrá riba un mundu selestial anterior pa medio di Su Tata; i atrobe, El a wòrdu engendrá pa un Tata mas antiguo ainda; etsétera, for di generashon pa generashon,...nos ke sa den nos mente, kon leu e generashonnan aki ta bai, i kon e promé mundu a wòrdu formá, i e promé tata a wòrdu engendrá."²⁷ Joseph Fielding Smith, di dies presidente di iglesia mormon a bisa ku "E Profeta a siña ku nos Tata tabatin un Tata, etsétera. Esaki no ta un pensamentu rasonabel...?"²⁸

XI. DIOSA MAMA-ESPOSA SELESTIAL

Mormonnan no solamente ta kere den Dios Tata; nan ta kere tambe den Dios Mama, esposa di Dios Tata. Maske nan no ta ador'é, tòg nan ta siña ku e ta nos "Mama Eternu." John A. Widtsoe, un outor mormon, a skirbi: "Di akuerdo ku e filosofia di e Evangelio, tin género maskulino i femenino na shelu. Komo ku nos tin un Tata, ku ta nos Dios, nos mester tin tambe un mama, poseéndo tur e atributonan di Divinidad."²⁹

"Implísito den e veridat di kristianismo ku tur hende ta yunan spiritu di un Tata Eterno, ta e bèrdat no menshoná ku nan ta tambe yunan di un Mama Eterno. Un Hòmber di Santidat eksaltá i glorifiká (Moises 6:57) no por ta un Tata, sino ku un Muhé di igual gloria, pèrfekshon i santidat tabata asosiá ku ne komo un Mama. Prokreashon di yunan ta hasi un hòmber un tata i un muhé un mama, sea ku nos ta trata ku hende den su estado mortal òf inmortal.

E doktrina ku tin un Mama na Shelu ta ser afirmá hopi kla pa medio di e Promé Presidencia di Iglesia (Joseph F. Smith, John R. Winder, i Anthon H. Lund)... nan a bisa ku 'hende komo un spiritu, ta engendrá i ta nase di mayornan selestial..."³⁰

No ta un problema pa mormonnan ku ni un di nan bukinan sagrado tin e idea di un diosa. Segun Joseph Fielding Smith: "E echu ku no tin un referensia tokante un mama na shelu ni den Beibel ni den e *Buki di Mormon* òf *Doktrina i Aliansanan*, no ta sufisiente prueba ku un mama no a eksistí ei...sanu huisio no ta bisa nos ku nos mester tin un mama tambe?"³¹ Segun nótulonon di Apòstel Abraham H. Cannon, 25 di ougùstùs 1890, Hosé Smith a haña un vishon di e Mama Eternu.³²

Ademas, e Santunan di e Deláster Dianan ta kere tambe ku méskos ku Dios Tata tabatin un tata, di mésun manera E mester tabatin un mama tambe. Brigham Young a bisa: "Ruman Kimball a sita Hosé e Profeta, ku lo e no adorá un Dios ku no tabatin un Tata; i mi no ta kere ku lo e hasi esaki si e no tabatin un mama; un ta mes absurdo ku e otro."³³

XII. ADAM TA DIOS

Iglesia di e Santunan di e Deláster Dianan semper tabatin hopi apresio pa Adam. Pero Brigham Young a eksaltá Adam te hasé Dios mes. Di bèrdat, esaki tabata un doktrina prinsipalmente siñá pa señor Young. Ta parse ku 9 aprel 1852, el a prediká e doktrina aki pa di promé biaha:

"Ora nos tata Adam a drenta hòfi di Eden, el a drenta e hòfi ku un kurpa selestial, i a trese Eva, un di su esposanan, huntu ku né. El a yuda krea i organisá e mundu aki. E ta Miguel, e Arkangel, e Ansiano di Dianan! di ken hòmbernan santu a skirbi i papia—E ta nos Tata i nos Dios, i e úniko Dios ku ken nos tin di hasi."³⁴

Tabatin hopi diskushon i desunion entre mormonnan tokante e siñansa aki. Entre otro e apòstel mormon Orson Pratt a hera bandoná mormonismo. Ma Brigham Young i otronan a persistí:

"...tur rudia lo dobla, i tur lenga konfesa ku e ta e Dios di henter mundu. Anto e palabranan di e Profeta Brigham, ora el a papia tokante Adam, lo ta kumplí —'E ta nos Tata i nos Dios, i e úniko Dios ku ken nos tin di hasi."³⁵

Tambe segun Brigham Young, Adam a drenta e hòfi ku un kurpa selestial; e no tabata kreá for di stòf di tera. "Bo ta kere ku Adam tabata kreá for di stòf di e tera aki. Esaki mi no ta kere, maske hende ta pensa ku esaki ta skirbí den Beibel;... mi a deklará públikamente ku mi no ta kere e teksto ei di Beibel manera kristiannan."³⁶

Young tambe a siñá ku Adam a yuda krea mundu. El a skirbi: "E (Adam) tabata e promé hende riba tera, i (pues e ta) su formadó i konstruktor. Huntu ku yudansa di su rumannan, el a trese (mundu) na eksistensia. Anto el a bisa, 'Mi ke pa mi yunan ku ta den e mundu spiritual bin biba aki."³⁷

Un otro énfasis ku ta sali for di e siñansa aki ta ku Adam ta tata di Hesus. Brigham Young a deklará:

"Ora Birgen Maria a sali na estado di e yu Hesus, e Tata a engendr'é den su mes semehansa... I ken ta e Tata? E ta e promé di e famia humano... Hesus, nos ruman mayó, a wòrdu engendrá den karni pa medio di e mésun persona ku tabata den e hòfi di Eden, i ku ta nos Tata na Shelu..."³⁸

Ansiano James A. Little a demonstrá kon fásil mormonnan ta kere nan lídernan ora el a atmití: "Mi ta kere den e prinsipio di obedensia; i si mi ta bisá ku Adam ta nos Tata i nos Dios, mi ta kere esei."³⁹ Un otro a skirbi tokante e siñansa nobo aki: "...e Profeta i Apòstel Brigham Young a deklará esei, i esei ta palabra di Señor."⁴⁰

Pa siña ku Adam tabata Dios den karni ta kita e seriedat for di e kaída di Adam i Eva i su konsekwensianan serio pa tur humanidat (Romanonan 5:12-21). Tambe e ta eliminá tur distinshon entre e Kreador i su kreashon: hende.

Mormonnan no ta siña esaki mas. Nan asta ta ekskomuniká esnan ku ta siña ku Adam ta Dios. Esaki ta lanta un pregunta. Di un banda nan ta deklará ku Brigham Young tabata un profeta inspirá. Di otro banda nan ta ekskomuniká esnan ku ta kere su siñansa. Ta klaro ku tin algu ku no ta kuadra.

XIII. HENDE POR BIRA DIOS

Satanas a gaña Eva ku e por ta méskos ku Dios si e kome di e palu di konosementu di bon i malu. Eva a kome, i komo resultado e tabata ekspulsá di hòfi di Eden huntu ku Adam. E mésun Satanás ku a gaña Eva ta purba gaña hende ku e mésun mentira awendia. Te awe, hende ta kere ku nan por ta méskos ku Dios òf bira un dios mes. Mormonismo ta konvensé ku e mentira satániko aki ta bèrdat. Brigham Young a deklará:

"Señor a krea abo i ami pa e propósito di bira Diosnan manera e mes...Nos a wòrdu kreá...pa bira Diosnan manera nos Tata na shelu."⁴¹

Na un otro okashon, señor Young a deklará: "Diosnan ta eksistí, i nos mester lucha pa ta prepará pa ta un ku nan."⁴² Poko luna promé ku su morto, José Smith a prediká:

"...boso mester siña kon boso mes por ta diosnan; pa ta reinan i saserdotenan di Dios, méskos ku tur diosnan; dor di avansá di un grado chikitu pa un otro, di grasia pa grasia, di eksaltashon pa eksaltashon, te ora boso por sinta den gloria méskos ku esnan ku ta sinta riba trono di poder etèrno..."⁴³

Segun Marion Romney, un miembro di e promé presidencia:

"Dios ta un alma perfekshoná i salvá, gosando bida etèrno. E ta tantu inmortal i eksaltá te n'é gloria di mas haltu. E ta gosa e kondishonbendishoná ku hende por alkansá pa medio di obedensia na e leinan i ordenansanan di e evangelio."⁴⁴

Mormonnan ta afirmá ku "...hende ta rei di reinan i señor di señornan den forma embrióniko."⁴⁵ Of bisá "Den korto, hende ta dios den forma embrióniko."⁴⁶

E di sínku presidente di iglesia mormon, Lorenzo Snow, a inisiá e dicho bon konosí entre mormonnan: "Manera hende ta, Dios tabata un tempu: manera Dios ta, hende por bira."⁴⁷ I Spencer W. Kimball, di diesdos presidente di iglesia mormon, mustrand ku kada individual tin potensial di bira un Dios, a bisa den un reunion pa saserdosia mormon: "Rumannan 225.000 di boso ta presente awe nochi. Mi ta suponé ku 225.000 di boso por bira diosnan. Ta parse ku tin bastante espasio aya den universo. I Señor a proba ku e sa kon pa hasié. Mi ta kere ku e por traha, òf probablemente laga nos yuda traha, mundunan pa tur di nos, pa kada un di nos 225.000."⁴⁸

Beibel ta mostra kla ku e siñansa ku hende por bira Dios a originá ku Satanás. Ademas Beibel ta laga sa ku ta impusibel ku hende por bira Dios: "Promé ku Mi ningun Dios no a wòrdu formá, i lo no tin ningun despues di Mi. Ami, si, Ami mes, ta SEÑOR, i no tin otro salvador fuera di Mi" (Isaias 43:10-11). Pa siña ku hende por bira Dios ta pa rebahá Dios na nivel di hende, i pa eksaltá hende na nivel di Dios. Esei ta presis loke teologia mormon ta hasi.

En kontraste di e Dios di e Santunan di Ultimo Dia, e Dios di Beibel ta etèrno (Salmo 90:2); soberano (Daniel 5:21), omnisiente (Salmo 139:1-6), omnipresente (Salmo 139:7-12), omnipotente (Salmo 139:13-16; Jeremias 32:17), infinito (II Krónikanan 6:18), ta eksistí riba Su mes (Exodo 3:14). E ta e úniko Dios bèrdadero (Isaias 40:18-25; 43-46; Juan 17:3). E ta Kreador di e totalidat di universo (Genesis 1:1; Juan 1:3). Ta klaro ku Iglesia di Hesukristo di e Santunan di e Delaster Dianan no ta adorá e Dios di Beibel. Nan ta adorá e dios robes. Esaki ta un problema sumamente serio, pasobra si bo tin e dios robes, henter bo doktrina ta kiboká. I si bo tin e dios robes, no ta importá kon deboto bo ta na e dios ei, nunca lo bo por drenta shelu.

-
- 1
 - 2
 - 3
 - 4
 - 5
 - 6
 - 7
 - 8
 - 9
 - 10
 - 11
 - 12
 - 13
 - 14
 - 15

16
17
18
19
20
21
22
23
24
25
26
27
28
29
30
31
32
33
34
35
36
37
38
39
40
41
42
43
44
45
46
47
48